



**PRIMEIRO
MINISTRO**

**DISKURSU SUA EXSELÊNCIA PRIMEIRU-MINISTRU
REPÚBLIKA DEMOKRÁTIKA TIMOR-LESTE,
DR. RUI MARIA DE ARAÚJO,
IHA OKAZIAUN DEBATE
KONTA JERAL ESTADU DE 2013**

**Parlamento Nacional
Loron 4 fulan Maiu tinan 2015**

Sua Exselência, Senhor Presidente do Parlamento Nacional ezersisiu
Suas Exselências, Senhores Vice-Presidentes do Parlamento Nacional
Suas Exselências, Senhoras e Senhores Deputados
Caros colegas, Membros do Governo
Senhoras e senhores,

Onra boot maka ohin VI Governu diriji mai iha Plenária Parlamentu Nasional ida ne'e, hodi Xefe Governu, hodi partisipa ba dala uluk, iha debate kona-ba Konta Jeral Estadu nian tinan 2013.

Rekizitu konstitusional, kona-ba Konta Jeral Estadu nian, sai hanesan instrumentu fundamental hodi halo fiskalizaun no julgamentu husi Kámara Kontas husi Tribunal Superior, Administrativu no Kontas nian, no mos apresiasaun polítika Parlamentu Nasional, nu'udar elementu indispensável ba konsolidasaun demokrátika ita nia país nian, hodi nune'e bele hatudu responsabilidade real iha asaun governativa.

Membrus VI Governu Konstitusional sira hotu, hatene katak, responsabilidade, étika no transparênsia hanesan kondisoens primordiais hodi asegura utilizaun korekta ba bens públikus sira. Haré ba kompleksidade no dinamismu mákina Estadu nian, nune'e, maka fundamental tebes atu kria no kontinua halo melloria ba mekanismu kontrolu, liu-liu husi fiskalizaun, atu nune'e bele tau ita nia respeito ba iha prosedimentus, ba iha leis, ba iha regulamentus no ba instrumentu seluk ne'ebé fó apoio hodi regula funsionamentu mákina Estadu nian.

Ita nia demokrasia ne'ebé sei jovem, iha ona kadru institusional ne'ebé foin hahú no iha hela prosesu konsolidasaun, nune'e mós hari'i ona iha instituisaun hotu hotu Estadu nian, atu ida idak tuir sira nia funsaun no responsabilidade, hodi kumpre papel importante fiskalizaun nian, ho kontrolo ba Governu nia servisu no administrasaun públika, sira nia opsoens, sira nia projektus no sira nia asoens.

La iha dúvida ida katak, ne'e realidade ida maka Kámara Kontas fó, hodi kontribui ba iha promosaun transparênsias ba iha kontas públicas. Sistema ne'ebé ita halo, esensial tebes, no mós hodi bele avalia sistema jestaun finanseira, no qualidade ezersísio governativu, hodi bele ajuda ita hodi hatete katak, ho hotu hotu nia servisu kontribui ba ema hotu nia di'ak, haburas Estadu no moris di'ak iha ita nia rai.

Nune'e, importante tebes atu oinsa ita bele asegura no fiskaliza hodi kumpre didi'ak kadru normativu no legal kona-ba jestasun finansas públicas, hodi nune'e bele hatudu lolós rezultadu ne'ebé ita hetan ona, mai husi rezultadu despezas públicas ne'ebé hala'o tinan tinan husi Orsamentu Jeral Estadu.

Ita hotu hatene katak, iha tinan hirak ikus liu mai ne'e, iha progresu ne'ebé notável tebes iha finansas públicas ho esforsu boot atu bele korige nafatin frakeza ne'ebé iha sistema sira ne'e, iha maka Ministériu Finanzas ho Governu tomak, implementa tuir rekomendasoens husi Kámara Kontas husi Tribunal Rekursu nomós husi Parlamentu Nasional husi tinan 2011 to' tinan 2012.

VI Governu empenhadu nafatin atu kontinua aplika medidas koretivas no reformas hodi garante katak osan Estadu nian, ne'ebé barak liu mai husi Fundu Petrolíferu, ne'ebé

tama iha Orsamentu Jeral Estadu nian, bele fó rezultadu ne'ebé satisfatóriu no fó impacto hodi hadi'a vida timor oan sira nian.

Nu'udar hato'o tiha ona, iha apresentasaun Orsamentu Rectifikativu 2015 nian, ami nia intensaun atu kontinua halo moderasaun iha nível despeza pública, liu-liu husi halo revizaun ba item ida idak, liña no despeza governamental, hodi hasai tiha osan ba despezas ne'ebé supérfulas hirak ne'ebé maka la fó vantajen di'ak ba ita nia ekonomia.

Sei mós iha disiplina maka'as ba iha preparasaun ba prioridades programátikas anuais, ho ierarkia ba objectivus sira, ne'ebé maka sai hanesan aspectu fundamental hodi bele alkansa kompromisu sira ne'e, hodi nune'e atu ezekeusaun ba despeza pública iha instituisaun governamental bele di'ak liu tan.

Aumenta organizaun no efisiênsia, no halo reforsu ba armonizasaun husi buat ne'ebé maka planu tiha ona no ne'ebé maka orsamentu tiha ona, atu fortalese mekanismu monitorizasaun ne'ebé nesesáriu no mós avaliasaun, la'os deit atu permite hodi alkansa objectivu sira ne'ebé ami hato'o tiha ona maibé hodi bele hatudu klaru no transparente liu tan ba Parlamentu Nasional nomós ba Sociedade Sivil.

Hodi nune'e, atu bele kumpre lolós ami nia kompromissu hodi hala'o auditorias sociais ne'ebé lolós, atu indikadores kona ba asaun governativa nian bele transparente lolós no responsável, maka hotu hotu tenke partisipa ho esforsu tomak hodi asegura prestasaun servisu ne'ebé di'ak liu ba ita nia povu.

Ho reforma sira ne'ebé maka sei halo, hodi bele kontribui di'ak liu tan ba jestaun finansas públicas no responsabilidade bo'ot liu tan ba sira nia intervenientes, rejime jurídiku ida kona-ba autonomia financeira, iha Administrasaun Estadu nian, sei sai hanesan instrumentu fundamental.

Ho armonizasaun legislativa ne'ebé ami hato'o, la'os iha deit ordenamentu jurídiku forte liu no konsistente maibé iha mós ifikásia no ifisiênsia ba iha funcionamentu iha estruturas públicas, hodi nune'e evita repetisaun ba iha funsoens nune'e mós bele ekonomiza iha rekursus.

Buat sira ne'e hotu hodi suporta atu administrasaun pública ida bele sai eficiente no sustentável, ho responsabilidade no responsabilizasaun boot liu ba servidores públicos, nune'e mós hodi halo revizaun ida ne'ebé klean liu ba nesesidades, kontratasoens no promoens iha funsaun pública.

Iha parte seluk, nu'udar hau hato'o tiha ona iha Uma Fukun ida ne'e, ami sei promove modelu sustentável ida ba Finansas Públicas, maka nune'e sei sevisu hodi bele mellora ekilíbriu fiskal país nian, hodi bele haré oinsá rekolla reseitas doméstikas naun petrolíferas, boot liu tan.

Exselências
Senhoras e senhores,

Kontas 2013 hetan ona auditoria husi Kâmara Kontas husi Tribunal Rekursu, hala'o tiha ona nia knar hodi halo validamentu, inklui análise detallada kona-ba prosesu

orsamental no ezekusaun ba reseita no despeza Estadu nian, tuir mai sei submete ba ita hotu nia debates. Señora Ministra das Finansas ho Membru Governu hotu hotu, sei fó sira nia kontribuisaun hodi halo esklaresimentu di'ak liu tan ba Distintos Deputados.

Nune'e, hau hakarak hato'o dala ida tan katak, rekomendasaun sira ne'ebé hato'o mai ami hodi halo melloria ba prosesu preparasaun no jestaun orsamental, ami sei simu ho responsabilidade tomak. Nune'e, ita bele verifika katak maioria rekomendasaun ne'ebé apresenta iha relatóriu Konta Jeral Estadu tinan 2011, 2012 no 2013, iha hela faze implementasaun no balu implementa tiha ona. VI Governu determinadu atu kontinua misaun ida ne'e.

Hau hakarak afirma iha ne'e katak, Governu iha sentidu rigor tomak ba iha nesesidade hodi rezolve frajilidades, problemas no inefisiências kona-ba jestaun no aplikasaun osan no bens públikus ne'ebé deteta iha ezersísius fiskalizaun sira ne'e.

Exselências
Senhoras e Senhores,

Ami hatene katak elaborasaun Orsamentu Jeral Estadu nian, sai hanesan ezersísiu ida, maibé ho mós kompleksidade ne'ebé boot no bazeia ba iha estimativa no projeksoens, maibé ami nia funsaun atu haka'as an hodi halo esforsu tomak hodi halo aprosimsaun ba iha realidade, tuir informasaun sira ne'ebé mak ami hato'o iha momentu ne'ebé determinadu. Ho forma ida ne'e maka ita bele ezekuta ho di'ak no koresponde ba nesesidade timor oan sira hotu nian.

Ho razaun ida ne'e, Governu hatene katak, prestasaun de kontas, iha sentido responsabilidade tomak no ho objectivo atu garante katak jestaun efisiente no transparente ba osan no bens públikus la'os hanesan aspirasaun deit maibé sai duni hanesan realidade ida, ne'ebé metin iha ita nia tradisaun governativa iha ita nia rai.

Ami hein katak iha debate durante loron ida nia laran sei bele hetan intendimentu diak kona-ba rekomendasoens sira ne'ebe laos deit mai husi tribunal rekursu maibe mai mos husi parlamentu nasional hodi nune'e hamutuk ita bele hadia konta de estadus e bele hadia diak liu tan mekanismu de impementasaun jestaun financeira osan públiku ninian iha tinan hirak oin mai.

Obrigada barak ba senhores Deputadus sira nia atensaun.

Díli, 4 de Maio de 2015
Dr. Rui Maria de Araújo